

摘藻堂四庫全書薈要

集部

欽定四庫全書薈要

集部

施註蘇詩卷十五
六

詳校官助教臣常循



欽定四庫全書薈要卷一萬四千九百六十六

其部

施註蘇詩卷十五

宋蘇軾撰

宋施元之註

武進邵長蘅刪補

詩四十二首

時守彭城作

次韻子由送趙屺歸觀錢塘遂赴永嘉

趙屺字景仁清

獻公子由蔭登第通判温州

歸舟轉河曲稍見楚山蒼候吏來迎客吳音已帶鄉言

從謝康樂先獻魯靈光已擊三千里何須四十強風流
半刺史清絕校書郎到郡詩成集尋谿水濺裳芒鞋隨
採藥蠶紙記流觴海靜蛟鼉出山空草木長宦游無遠
近民事要更嘗願子傳家法他年請尚方

南史謝靈運襲封康樂公為永嘉太守郡有名山水肆
意遊遨謝承後漢書王延壽有雋才父逸欲作魯靈光
殿賦令延壽往錄其狀延壽因韻之以簡其父父曰吾
無以加也時蔡邕亦有此作十年不成見延壽賦遂隱
而不出莊子逍遙游鵬之徙於南冥也水擊三千里禮
記四十曰強而仕舊唐書蕭徽傳昔庾亮與郭游書別
駕舊與刺史別乘任居刺史之半安可非其人也唐百
官志校書郎正九品主掌讐校典籍刊正文章南史王

筠每一官成一集文房四譜右軍蘭亭帖用蠶蠶紙鼠
須筆書又蘭亭序清流激湍映帶左右引以為流觴曲
水列坐其次漢朱雲傳願賜尚方斬馬劍斷佞臣一人
頭詳見十二卷次韻答邦直子由闕詩注按公作清獻
神道碑云為殿中侍御史彈劾
不避權倖京師號鐵面御史

中秋月三首

殷勤去年月澹灩古城東憔悴去年人臥病破牕中徘徊
巧相覓窈窕穿房櫳月豈知我病但見歌樓空撫枕
三歎息扶杖起相從天風不相衰吹我落瓊宮白露入
肺肝夜吟如秋蟲坐令太白豪化為東野窮餘年知幾

何佳月豈屢逢寒魚亦不睡竟夕相唵

宜檢切 喁

李白月下獨酌詩我歌月徘徊我舞影凌亂韓退之記
夢詩隆樓傑閣磊嵬高天風飄飄吹我過張平子思立
賦叫帝閭使闢扉兮覲天皇之瓊宮韓退之秋懷詩蟲
吊寒夜永又薦士詩有窮者孟郊受材實雄鷲郊字東
野說文唵喁魚口上出貌左太冲吳都賦泝洄順
流唵喁沈浮何諷夢渴賦鯤鯨唵喁相响以四

六年逢此月五年照離別

公自注中秋有月凡六年
矣惟去歲與子由會於此 歌

君離別曲滿坐為淒咽留都信繁麗此會豈易擲鎔銀
百頃湖挂鏡千尋闕三更歌吹罷人影亂清樾歸來北
堂下寒光翻露葉喚酒與婦飲念我向兒說豈知衰病

後空盞對稊粟但見古河東
收麥如鋪雪欲和去年曲

復恐心斷絕

留都子由時之官南京南京有畱守司故云畱都白樂
天詩冰消湖水銀為面風卷沙汀玉作堆韻注樾木陰
也韓退之詩妻孥恐我生悵望槃中不飭粟與梨白樂
天詩收麥鋪花白又村夜詩月明收麥花如雪鮑明遠
東門行涕零心斷絕將去復還訣

舒子在汶上閉門相對清

公自注舒煥試舉人鄆州

鄭子向河朔

公自

注鄭僅赴北京戶曹

孤舟連夜行頓子雖咫尺兀如在牢扃

公自注頓

起來徐試舉人

趙子寄書來水調有餘聲

公自注今日得趙杲卿書猶記余在東武

中秋所作
水調歌頭

悠哉四子心共此千里明明月不解老良辰

難合并回頭坐上人聚散如流萍嘗聞此宵月萬里同

陰晴

公自注故人史生為余言嘗見海賈云中秋有月則是歲珠多而圓賈人常以此候之雖相去萬里

他日會合相問則陰晴無不同者

天公自著意此會那可輕明年各相

望俯仰今古情

謝希逸月賦美人邁兮音塵闕隔千里兮共明月鮑明遠翫月詩三五二八時千里與君同

中秋見月寄子由

明月未出羣山高瑞光萬丈生白毫一杯未盡銀闕涌

亂雲脫壞如崩濤誰為天公洗眸子應費明河千斛水
遂令冷看世間人照我湛然心不起西南大星如彈丸
角尾奕奕蒼龍蟠今宵注眼看
不見更許螢火爭清寒
何人艤舟臨古汴千燈夜作魚龍變曲折無心逐浪花

低昂赴節隨歌板

公自注是夜賈客舟中放水燈

青熒滅沒轉前山浪

颭風迴豈復堅明月易低人易散歸來呼酒更重看堂
前月色愈清好咽咽寒螿鳴露草卷簾推戶寂無人
牕

下呶啞惟楚老

公自注近有一孫名楚老

南都從事莫羞貧對月題

詩有幾人明朝人事隨日出恍然一夢瑤臺客

韓退之月蝕詩念此日月者為天之眼睛盧仝詩東方
蒼龍角插戟尾搖風史記項籍傳烏江亭長艤船待注
附船著岸也陸機文賦舞者赴節以投袂武元衡詩無
因駐清景日出事還生盧子逸史許溍暴卒三日寤而
作詩云曉入瑤臺露氣清坐中惟見許
飛瓊李公丞鶯鶯歌恍然夢作瑤臺客

答王鞏

公自注鞏將見過有
詩自謂惡客戲之

汴泗遠吾城城堅如削鐵中有李臨淮號令肝膽裂古
來彭城守未省怕惡客惡客云是誰祥符相公孫是家
豪逸生有種千金一擲頗黎盆連車載酒來不飲外酒

嫌其村子有千餅酒我有萬株菊任子滿頭插團團見
花不見目醉中插花歸花重壓折軸問客何所須客言
我愛山青山自遼郭不要買山錢此外有黃樓樓下一
河水美哉洋洋乎可以療饑并洗耳彭城之遊樂復樂
客惡何如主人惡

杜詩大城鐵不如唐書李光弼傳寶應元年進封臨淮
郡王常鎮徐州郝廷玉傳魚朝恩聞其善布陣請觀之
廷玉申號令鳴鼓角部伍坐作進退齊一曰此臨淮王
遺法也王善御軍每校旗不如令者輒斬由是人皆自
効而赴蹈馳突心破膽裂元次山詩有時逢惡客還家
亦少酣注非酒徒即為惡客祥符相公鞏大父魏國文

正公也相真宗於景德祥符間漢陳勝傳侯王將相寧
有種乎李太白詩莫惜連船沽美酒千金一擲買春芳
韓退之詩豁呀鉅壑頗黎盆張平子南都賦騰酒車而
斟酌注以車載酒也杜子美詩撥弃潭州百斛酒燕沒
瀟岸千株菊杜牧九日詩菊花須插滿頭歸漢書景十
三王傳叢輕折軸羽翮飛肉史記孔子世家臨河而歎
曰美哉水洋洋乎詩國
風泌之洋洋可以樂飢

次韻王定國馬上見寄

昨夜霜風入袂衣曉來病骨更支離
踈狂似我人誰顧
坎軻憐君志未移
但恨不攜桃葉女
尚能來趁菊花時

南臺二謝人無繼
直恐君詩勝義熙

公自注二謝從宋武帝九日燕戲馬

臺

莊子支離疏者願隱於臍肩高於頂白樂天詩猶勝村
客病支離楚詞罔軒留滯注不遇也罔坎同古今樂錄
王獻之二妾桃葉桃根獻之作
桃葉歌白樂天詩小妓攜桃葉

與頓起孫勉泛舟探韻得未一作味字

牕前堆梧桐牀下鳴絡緯佳人尺書到客子中夜喟朝
來一樽酒晤語聊自慰秋蠅已無聲霜蟹初有味當為
壯士飲背裂須磔蝟勿作兒女懷坐念蠨蛸畏山城亦
何有一笑瀉肝胃泛舟以娛君魚鼈多可餽縱為十日

飲未遽主人費吾儕俱老矣耿耿知自貴寧能傍門戶
啼笑雜猩猩要將百篇詩一吐千丈氣蕭條歲行暮迨
此霜雪未明朝出城南遺跡觀楚魏西風迫吹帽金菊
亂如沸願君勿言歸輕別吾所諱

遯齋閒覽浙人呼蝨斯之善鳴者為絡緯織女詩國風
彼美淑姬可與晤語史記項籍紀樊噲瞋目視項王頭
髮上指目眦盡裂晉桓溫傳劉惔嘗稱之曰溫眼如紫
石稜須作蝟毛磔孫仲謀晉宣王之流也詩豳風蠨蛸
在戶又亦可畏也伊可懷也爾雅蠨蛸小蜘蛛長腳者
俗呼喜子論語疏腥曰餽謂生肉未煮者東方朔傳上
語竇太主曰恐羣臣從官多大為主費當是時董君見
尊不名稱主人翁飲大驩樂左思賦猩猩啼而就禽狒

狒笑而被格注猩猩形若狗人面善人言被執將死則相對而泣狒狒狀如人長面黑身有尾踵見人即笑笑則脣掩目晉和嶠傳森森如千丈松韓退之詩李杜文章在光燄萬丈長國語靈王不顧其民一國棄之如遺跡馬韓退之薦士詩霜風破佳菊嘉節迫吹帽詩大雅如蝸如塘如沸如羹魏志陳登傳劉備曰君求田問舍言無可采是元龍所諱也

次韻答頓起二首

挽袖推腰踏破紳舊聞攜手上天門相逢應覺聲容似
欲話先驚歲月奔新學已皆從許子諸生猶自畏何蕃
殿廬直宿真如夢猶記憂時策萬言
公自注頓君及第時余為殿試編排

官見其答策語頗直其後與子由試舉人西京既罷
回登嵩山絕頂嘗見其唱疇詩十餘首頓詩中及之
左傳或挽之或推之韓退之誰氏子詩白頭老母遮門
啼挽斷衫袖留不止太山記上有小天門大天門仰視
天門如從穴中望天牕王注新學以言王介甫新經之
學也韓愈何蕃傳蕃入太學二十餘年歲舉進士學成
行尊太學諸生推
頌不敢與蕃齒

十二東秦比漢京去年古寺共題名

公自注去歲見之於青州

早衰

怪我遽如許苦學憐君太瘦生茅屋擬歸田二頃金丹
終掃雪千莖何人更似蘇司業和遍新詩滿洛城

漢書高祖紀田甬曰秦形勝之國帶河阻山縣隔千里
秦得百二焉地方二千里持戟百萬齊得十二焉此東

西秦也陸士衡齊謳行孟諸吞楚夢百二侔秦京後漢
左慈傳曹操欲殺之慈走入羊羣忽一老羝屈膝人言
曰遽如許太瘦生用李白嘲杜甫詩已見前
注王注蘇司業源明也先生以比子由云

九日黃樓作

去年重陽不可說南城夜半千漚發水穿城下作雷鳴
泥滿城頭飛雨滑黃花白酒無人問日暮歸來洗鞞鞢
豈知還復有今年把盞對花容一呷莫嫌酒薄紅粉陋
終勝泥中千柄鍤黃樓新成壁未乾清河已落霜初殺
朝來白露如細雨南山不見千尋剝樓前便作海茫茫

樓下空聞鶻鴞軋薄寒中人老可畏熱酒澆腸氣先壓

煙消日出見漁村遠水鱗鱗山齧齧

牛轄切

詩人猛士雜

龍虎

公自注坐客三十餘人多知名之士

楚舞吳歌亂鵝鴨一杯相屬君

勿辭此景何殊泛清雲

杜牧之詩歸棹何時聞軋鴞楚詞九辯懽悽增歎兮薄
寒之中人韓退之聯句交斫雙缺齧韻注缺齒又器缺
也一曰獸食之餘曰齧漢張良傳上顧戚夫人曰為我
楚舞吾為若楚歌李白詩吳歌楚舞歡未畢青山欲銜
半邊日唐史李愬夜入蔡州擊鵝鴨
池以亂軍聲響溪在湖州注再見

太虛以黃樓賦見寄作詩為謝

我在黃樓上欲作黃樓詩忽得故人書中有黃樓詞黃樓高十丈下建五丈旗楚山以為城泗水以為池我詩無傑句萬景驕莫隨夫子獨何妙雨雹散雷椎雄詞雜今古中有屈宋姿南山多磬石清滑如流脂朱蠟為摹刻細妙分毫釐佳處未易識當有來者知

秦始皇紀下可以建五丈旗詳見四卷戲子由詩注張景陽七命豐隆奮椎注豐隆雷公也唐杜審言傳嘗曰吾文章當得屈宋作衙官尚書孔安國注泗水涯石可以為磬杜牧秋娘詩京江水清滑生女白如脂

九日次韻王鞏

我醉欲眠君罷休已教從事到青州鬢霜饒我三千丈
詩律輸君一百籌聞道郎君閉東閣且容老子南樓
相逢不用忙歸去明日黃花蝶也愁

世說桓公有主簿善別酒有酒輒令先嘗好者謂青州
從事惡者謂平原督郵青州屬齊郡平原有鬲縣從事
謂到臍下督郵謂在膈上住也李白詩白髮三千丈緣
愁似箇長郎君東閣用李義山謁令狐綯詩語已見前
注晉庾亮傳亮在武昌諸佐吏啟浩之徒乘秋夜往登
南樓不覺亮至諸人將起避之亮曰諸君少住老子於
此興復不淺

送頓起

客路相逢難為樂常不足臨行挽衫袖更賞折殘菊佳
人亦何念悽斷陽關曲酒闌不忍去共接一寸燭留君
終無窮歸駕不免促岱宗已在眼一往繼前躅天門四
十里夜看扶桑浴回頭一作顧望彭城大海浮一粟故人
在其下塵土相颺蹴惟有黃樓詩千古配淇澳公白注頓有詩

記黃樓
本末

白樂天詩相逢且莫推辭醉聽唱陽關第四聲一寸燭
用竟陵王子良刻燭為詩事已見前注唐書柳公權充
翰林學士文宗夜召對燭盡而語不盡宮人以蠟液濡
紙繼之後漢光武紀趣駕南轅注趣急也讀曰促漢官

儀泰山東上四十里至天門又東南有峯名日觀雞鳴時見日始出淮南子曰出暘谷浴乎咸池入於扶桑是謂晨明東方朔十洲記扶桑在碧海中葉似桑樹長數千丈大二十圍兩兩同根更相依傍是名扶桑詩同風衛淇澳美武公之德也

送孫勉

昔年罷東武曾過北海縣白河翻雪浪黃土如烝麩桑麻冠東方一熟天下賤是時累饑饉常苦盜賊變每憐追胥官野宿風裂面君為淮南秀文采照金殿

公自注君嘗考

中進士第一人胡為事奔走投筆腰羽箭更被髯叅軍豪篇來

督戰

公自注其兄莘老以詩寄之皆言戰事

親程三郡士玉石不能銜欲

知君得人失者亦稱善君才無不可要欲經百鍊吾詩

堪咀嚼聊送別酒嚙

九域志密州古跡有伏湛墓其志云瑯邪東武人高密
即東武也又濰州治北海縣追胥字出周禮小司徒注
已見後漢班超傳嘗為官傭書輟業投筆嘆曰大丈夫
無它志畧猶當効傅介子張騫立功異域以取封侯安
能久事筆硯間乎李太白詩流星白羽腰間插晉郗超
傳桓温為大司馬辟超為參軍時王珣為主簿府中語
曰髯叅軍短主簿能令公喜能令公怒超髯珣短故也
又互見十四卷史記秦始皇紀以衡石量書日夜有程
不中程不得休息漢東方朔傳武帝既招英俊程其器
能用之如不及揚子銜玉而賈石者其狙詐乎應劭漢

官儀金取堅剛百鍊而不耗孟東野懷憫詩好詩
更相嫉劍戟生牙關前賢死已久猶在咀嚼間

李思訓畫長江絕島圖

唐張彥遠名畫記李思
訓宗室也林甫之伯父

畫稱一時之妙官至左武衛大將軍其畫山
水樹石筆格道勁湍瀨潺湲雲霞縹緲時睹
神仙之事窅然巖嶺之
幽時人謂之李將軍也

山蒼蒼江茫茫大孤小孤江中央崖崩路絕猿鳥去惟
有喬木攙天長客舟何處來棹歌中流聲抑揚沙平風
軟望不到孤山久與船低昂峩峩兩煙鬟曉鏡開新粧
舟中賈客莫漫狂小姑前年嫁彭郎

庚信傷心賦山蒼蒼而正寒杜子美詩春動江茫茫斛
律金敕勒歌天蒼蒼野茫茫風吹草低見牛羊漢武秋
風辭橫中流兮揚素波蕭鼓鳴兮發棹歌丘遲詩棹歌
發中流鳴鞀響杳嶂杜牧阿房宮賦明星熒熒開粧鏡
也綠雲擾擾梳曉鬟也歐陽歸田錄世俗傳訛惟祠廟
之名尤甚江南有大小孤山而世俗轉孤為姑江側有
一石磯謂之澎浪磯遂轉為彭郎云彭郎小姑壻也余
過小孤山廟像乃一婦人而敕額為聖母廟豈止俚俗
之謬哉春明退朝錄陳簡夫詩云山稱孤獨
字廟塑女郎形過客雖知誤行人但乞靈

次韻答王鞏

我有方外客顏如瓊之英十年塵土窟一寸冰雪清竭
來從我游坦率見真情顧我無足戀戀此山水清新詩

如彈丸脫手不暫停昨日放魚回夜巾滿浮萍今日扁
舟去白酒載烏程山頭見月出江路聞鼉鳴莫作孺子
歌滄浪濯吾纓吾詩自堪唱相子權歌聲

晉謝奕傳桓温辟為安西司馬岸幘笑詠無異常日温
曰我方外司馬詩國風有女同車顏如舜英杜子美留
別章使君詩常恐性坦率失身為杯酒南史謝朓嘗云
好詩圓美流轉如彈丸也鄒陽酒賦其品類則洛陽醴
滌烏程若下又詳五卷贈孫莘老詩注禮記春不相
注相謂送杵聲李太白詩滄浪吾有曲寄入棹歌聲

張安道見示近詩

人物一衰謝微言難重尋殷勤永嘉末復聞正始音清

談未足多感時意殊深少年有奇志欲和南風琴荒林

蝸蝨

一作蝨

亂廢沼蛙蝮淫遂欲掩兩耳臨文但噫瘖蕭

然王郎子來自緱山陰

公自注其壻王鞏攜來

云見浮丘伯吹簫

明月岑遺聲落淮泗蛟鼉為悲吟願公正王度祈招繼

惛惛

漢司馬遷傳仲尼沒而微言絕晉衛玠傳王敦謂謝鯤曰微言之緒絕而復續不意永嘉之末復聞正始之音互見十三卷左傳昭三十一年荀躒掩耳而走太平廣記王仙客者劉振之甥也振有女曰無雙小仙客數歲皆幼稚相狎振妻常呼仙客為王郎子列仙傳王子喬好吹簫作鳳鳴遇浮丘公得仙互見前注公烏臺詩云

張方平令王鞏將詩一卷來徐州軾作一詩題卷末云
云軾意言人物衰謝不意復見張方平之文章才氣以
譏諷今時衰薄也意以衛玠比方平故云清談未足多
也又少年有奇志至臨文但噫喑言軾少年本有志欲
和天子薰風之詩因見學者皆空言無實或雜引老佛
異端之書文字雜亂故以荒林廢沼比朝廷新法屢有
變改事多荒廢致風俗虛浮學者誕妄如蝸蝨之紛亂
遂掩耳不欲論文也願公正王度祈招繼惜惜據左氏
楚靈王欲求鼎於周求地於諸侯其臣右尹子革諫王
其詩曰祈招之惜惜式昭德音思我王度式如玉式如
金形民之力而無醉飽之心靈王不能用以及於難
軾欲張方平當如蔡公謀父作祈招之詩以正王也

次韻王鞏顏復同泛舟

沈郎清瘦不勝衣邊老便帶十圍躩躩身輕山上走

謹呼船重醉中歸舞腰似雪金釵落談辯如雲玉塵揮
憶在錢塘正如此回頭四十二年非

南火沈約與徐勉書云老病百日數圍草帶嘗應移孔
以手握臂率計月小半分檀弓趙文子其中退然若不
勝衣後漢東平王蒼腰帶十圍晉載記尹緯慕容超李
勢赫連勃勃皆身長八尺腰帶十圍云便便用邊孝先
事注再見楚辭衆蹠蹠而日進兮注蹠蹠行鳧李太白
效占詩歸時落日晚蹠蹠浮雲驄杜子美詩三更風起
寒浪湧取樂喧呼覺船重白氏六帖趙飛燕舞宛轉如
流風之迴雪據言杜牧與官妓賭酒因微吟曰骰子巡
巡裏手拈無因得見玉纖纖張祐應聲曰但知報道金
釵落彷彿還應露指尖後漢符融幅巾奮裋談辭如雲
注已見晉孫盛傳嘗詣殷浩談論對食奮擲塵尾毛落
飯中王衍傳每捉玉柄塵尾與手同色按東坡先生以

景祐三年丙子生是年元豐元年戊午年四十有三故云回頭四十二年非

次韻張十七九日贈子由

千戈萬槊擁笳籬九日清樽豈復持

公自注是日南都敕使按兵

官

事無窮何日了菊花有信不吾欺逍遙瓊館真堪羨取次塵纓未可縻迨此暇時須痛飲他年長劍拄君頤

晉史傅咸劾事云令史張濟案行城東有新立屋間笳籬障二十丈晉傅咸傳楊濟與咸書曰天下大器非可稍了而相觀每事欲了生子癡了官事官事未易了也了事正作癡復為快耳詩小雅迨我暇矣飲此滑矣杜子美醉時歌忘形到爾汝痛飲真吾師戰國策田單攻狄不能下齊兒謠曰大冠若箕修劍拄頤攻狄不下累

於梧丘李太白答王十二詩巖陵高
揖漢天子何必長劍挂願事玉階

次韻王鞏獨眠

居士身心如槁木旅館孤眠體生粟誰能相思琢白玉
服藥千朝償一宿天寒日短銀燈續欲往從之車脫軸
何人吹斷參差竹泗水茫茫鴨頭綠

趙飛燕外傳體溫舒無軫粟盧仝詩白玉璞裏琢出相
思心黃金鑛裏鑄出相思淚續仙傳彭祖云上士別牀
中士異被服藥百裹不如獨臥後人習其術號彭祖經
周易輿說輻史記范睢傳須賈曰吾馬病車軸折楚辭
九歌吹參差兮誰思

次韻王鞏留別

去國已八年故人今有誰當時交游內未數蔡克兒豈
無知我者好爵半已縻爭為東閣吏不顧北山移公子
表獨立與世頗異馳不辭千里遠成此一段奇蛾眉亦
可憐無奈思餅師無人伴客寢惟有支牀龜君歸與何
人文字相娛嬉持此調張子一笑當脫頤

晉王導傳蔡謨戲嘲導導怒謂人曰吾往與羣賢共游
洛中何曾聞有蔡克兒也謨蔡克子漢朱雲傳薛宣為
丞相雲往見之宣備賓主禮從容謂雲曰在田野無事
且畱我東閣可以觀四方奇士雲曰小生乃欲相吏耶

宣不敢復言楚辭九歌表獨立兮山之上王羲之帖吾
年垂耳順要欲一遊目汶領足下但當保護以俟此期
得果此緣一段奇事也本事詩寧王宅左有賣餅妻纖
白明媚王一見屬目厚惠其夫取之寵愛逾等踰歲問
曰汝復憶餅師否默然不對王召餅師使見之其妻注
視雙淚垂頰若不勝情王乃歸之時坐客數人皆當時
文士無不悽異王命賦詩右丞王維先成曰莫以今時
寵難忘舊日恩看花滿眼淚不共楚王言史記龜策傳
南方老人用龜支牀足行二十歲老人死移牀龜尚生
龜能行氣導引也張子謂安道也脫頤用匡衡解頤意
見注已

登雲龍山

醉中走上黃茅岡滿岡亂石如羣羊岡頭醉倒石作牀

仰看白雲天茫茫歌聲落谷秋風長
路人舉首東南望拍手大笑使君狂

次韻僧潛見贈

僧道潛字參寥於潛人能文章尤喜為詩嘗有句云風蒲獵獵

弄輕柔欲立蜻蜓不自由五月臨平山下路
藕花無數滿汀洲過先生於彭城甚愛之以
書告文與可謂其詩句清絕與林逋上下而
通了道義見之令人蕭然蘇黃門每稱其體
製絕類儲光義非近時詩僧所能及

道人胸中水鏡清萬象起滅無逃形
獨依古寺種秋菊要伴騷人餐落英
人間底處有南北紛紛鴻鴈何曾冥

閉門坐穴一禪榻頭上歲月空崢嶸今年偶出為求法
欲與慧劍加礮礪雲衲新磨山水出霜髭不剪兒童驚
公侯欲識不可得故知倚市無傾城秋風吹夢過淮水
想見橘柚垂空庭故人各在天一角相望落落如晨星
彭陵老守何足顧棗林桑野相邀迎千山不憚荒店遠
兩脚欲趁飛猿輕多生綺語磨不盡尚有宛轉詩人情
猿吟鶴唳本無意不知下有行人行空堦夜雨自清絕
誰使掩抑啼孤惇我欲仙山掇瑤草傾筐坐嘆何時盈

簿書鞭扑晝填委煑茗燒粟宜宵征乞取摩尼照濁水
共看落月金盆傾

晉衛瓘見樂廣善談論奇之曰此人之水鏡見之瑩然
傳燈錄六祖曰人有南北佛性無南北穴榻暗使管寧
木榻事注見九卷遊靈隱高峰塔詩維摩經以智慧劍
破煩惱賊揚子有刀者礮諸莊子養生主刀刃若新發
於硯漢貨殖傳諺曰刺繡文不如倚市門劉禹錫送張
盩序向所謂同年友當其盛時聯袂舉鑣亘絕九衢若
屏風然今來落落如曙星之相望杜子美贈李白詩亦
有梁宋遊相期拾瑤草詩國風采采卷耳不盈傾筐杜
贈閻丘師兄詩夜闌接軟語落月如
金盆又惟有摩尼珠可照濁水源

次韻潛師放魚

法師說法臨泗水無數天花隨麈尾勸將淨業種西方
莫待夢中呼起起衰哉若魚竟坐口遠愧知幾穆生醴
況逢孟簡對盧仝不怕校人欺子美疲民尚作魚尾赤
數畧未除吾顙泚法師自有夜中珠不用辛苦沙泥底

佛頂心經說此陀羅尼已天雨寶花續紛亂下高僧傳
梁僧法雲講次天花散墜起用鄭玄夢孔子事詳十
卷孔長源挽詩注漢楚元王傳穆生不嗜酒元王常為
穆生設醴及王戊即位常設後忘設焉穆生退曰可以
逝矣醴酒不設王之意怠不去楚人將鉗我於市稱疾
臥申公白生強起之穆生曰易稱知幾其神乎君子見
幾而作不俟終日遂謝病去唐孟簡為常州刺史與盧
仝遊北湖盡買漁人所獲魚放之仝作觀放魚歌校人

鄭子產事見孟子左傳襄二十五年子美入數倖而出杜預曰子美子產也詩國風魴魚頰尾鄭箋頰赤也君子仕於亂世其顏色瘦病如魚勞則尾赤楞嚴經譬如有人於自衣繫如意珠不自覺知窮露它方乞食馳走忽有智者指視其珠所願從心致大饒富方悟神珠非從外得白樂天放魚詩不須泥沙底辛苦覓明珠公烏臺詩棠元豐元年四月作次韻潛師放魚詩一首云疲民尚作魚尾赤左傳云如魚窺尾衡流而方羊喬注云魚勞則尾赤是時徐州大水之後大役數起軾言民疲病如魚勞而尾赤也數罟謂魚網之細密者以言民既疲病朝廷又行青苗助役不為除放如密網之取魚皆以譏朝廷新法不便以致大水之災也

與舒教授張山人叅寥師同遊戲馬臺書西軒

壁兼簡顏長道二首

古寺長廊院院行此軒偏慰旅人情
楚山西斷如迎客
汴水南來故遶城路失玉鉤芳草合林亡白鶴古泉清
淡游何以娛庠老坐聽郊原琢磬聲

桂花叢談咸通中李蔚鎮彭城於戲馬臺西連玉鉤斜道開創池沼構葺亭臺名之曰賞心白鶴則山中故事也陳無已詩話乃云眉山長公守徐嘗與客登項氏戲馬臺賦詩云路失玉鉤芳草合林亡白鶴古泉清廣陵亦有戲馬臺其下有路號玉鉤斜唐高宗東封有鶴下焉乃詔諸州為老氏築宮名白鶴公蓋誤用而後所取信故不得不辨也禮記有虞氏養國老於上庠養庶老於下庠王注泗濱多磬石故云琢磬聲

竹杖芒屨取次行下臨官道見人情
天寒菽粟猶栖畝

日暮牛羊自入城沽酒獨教陶令醉題詩誰似皎公清
更尋陋巷顏夫子乞取微言繼此聲

左思魏都賦餘糧栖畝而不收詩國風日之夕矣牛羊
下括王注廬山僧惠遠與陶潛遊常沽酒飲之又吳興
僧清畫字皎然唐時有詩名於世
又稱長道為顏夫子故使陋巷字

滕縣時同年西園

人皆種榆柳坐待十畝陰我獨種松栢守此一片心君
看閭里間盛衰日駸駸種木不種德聚散如飛禽老時
吾不識用意一何深知人得數士重義忘千金西園手

所開珍木來千岑養此霜雪根遲彼鸞鳳吟池塘得流
水龜魚自浮沈幽桂日夜長白花亂青衿豈獨蕃草木
子孫已成林拱把不知數會當出千尋樊侯種梓漆壽
張富華簪我作西園詩以為里人箴

杜子美詩飽聞檜木三年大與致溪邊十畝陰禮記如
竹箭之有筠也如松柏之有心也貫四時而不改柯易
葉白樂天詩屈曲閒池沼無非手自開本草菌桂花白
蕙黃杜桂亦曰白華葉冬夏常青文子十圍之大始於
拱把後漢樊宏傳宏字靡鄉南陽湖陽人也世祖之舅
父重嘗欲作器物先種梓漆時人嗤之然積以歲月皆
得其用向之笑者咸求假焉貲至巨萬而賑贍宗族恩
加鄉閭建武十五年定封宏壽張侯十八年帝過湖陽

祠重墓追爵謚
為壽張敬侯

次韻王庭老和張十七九日見寄

霜葉投空雀啅籬上樓筋力强扶持對花把酒未甘老
膏面染鬚聊自欺無事亦知君好飲多才終恐世相縻
請看平日銜杯口會有金椎為控頤

杜牧題北樓詩不為尋山試筋力肯能寒上背雲樓劉
夢得詩筋力上樓知又近來時世輕先輩好染鬚鬚事
後生晉陸機傳張華嘗謂之曰人為文常恨才少子更
患多莊子外物篇儒以詩禮發冢大儒臚傳曰東方作
矣事之何若小儒曰未解裾襦口中珠
儒以金椎控其頤徐別其頰無傷口中珠

次韻參寥師寄秦太虛三絕句時秦舉進士不
得

秦郎文字固超然漢武憑虛意欲仙
底事秋來不得解
定中試與問諸天

漢司馬相如傳既奏大人賦天子說飄飄然有陵雲氣
遊天地之間意太平廣記袁昂書評云張伯英書如漢
武愛道憑虛欲仙劉禹錫和宣上人放榜
詩借問至公誰印可支郎天眼定中觀

一尾追風抹萬蹄昆崙玄圃謂朝隤
回看世上無伯樂
卻道鹽車勝月題

崔豹古今注秦始皇有七名馬一曰追風杜子美遣興
詩地用莫如馬無良復誰記此日千里鳴追風可君意
十洲記崑崙山三角北曰閭風西曰玄圃東曰崑崙宮
韓退之雜說世有伯樂然後有千里馬千里馬常有而
伯樂不常有莊子馬蹄篇加之以衡扼齊之以
月題音義云月題馬額上當顛如月形者也

得喪秋毫久已冥不須聞此氣崢嶸何妨卻伴參寥子
無數新詩咳唾成

與參寥師行園中得黃耳蕈

遣化何時取衆香法筵齋鉢入淒涼寒蔬病甲誰能採

落葉一作藥空畦半已荒老楮忽生黃耳菌故人兼致白

芽薑蕭然放箸東南去又入春山荀蕨鄉

維摩經遣化菩薩往衆香國禮彼佛足言願得世尊所
食之餘欲於娑婆世界施作佛事於是香積如來以衆
香鉢盛滿香飯與
化菩薩悉飽衆會

百步洪 并引

王定國訪余於彭城一日棹小舟與顏長道攜盼
英卿三子游泗水北上聖女山南下百步洪吹笛
飲酒乘月而歸余時以事不得往夜著羽衣佇立
黃樓上相視而笑以為李太白死世間無此樂三

百餘年矣定國既去逾月復與參寥師放舟洪下

追懷曩遊已為陳迹喟然而嘆故作二詩一以遺

參寥一以寄定國且示顏長道舒堯文邀同賦云

長洪斗落生跳波輕舟南下如投梭水師絕叫鳧鴈起

亂石一線爭磋磨有如兔走鷹隼落駿馬下注千丈坡

斷絃離柱箭脫手飛電過隙珠翻荷四山眩轉風掠耳

但見流沫生千渦嶮中得樂雖一快何異水伯夸秋河

我生乘化日夜逝坐覺一念逾新羅紛紛爭奪醉夢裏

豈信荆棘埋銅駝覺來俯仰失千劫回視此水殊委蛇
君看岸邊蒼石上古來篙眼如蜂窠但應此心無所住
造物雖駛如吾何回船上馬各歸去多言譎譎師所呵

流沫用莊子已見前注莊子秋水篇秋水時至百川灌
河涇流之大兩涘渚涯之間不辨牛馬於是馬河伯欣
然自喜又互見七卷八月十五觀潮詩注僧燈錄僧問
金鱗寶資大師如何是金剛一隻箭師曰過新羅國去
又古德云鷄子過新羅晉索靖傳有先識遠量知天下
將亂指洛陽宮門銅駝嘆曰會見汝在荆棘中揚子譎
譎者天下皆訟也又呱呱之子各識其親譎譎
之學各習其師華嚴經愚人之所貪諸佛所訶

佳人未肯回秋波幼輿欲語防飛梭輕舟弄水買一笑

醉中盪漿肩相磨同不學長安閭里俠貂裘夜走臙脂

坡獨將詩句擬鮑謝涉江共採秋江荷不知詩中道何

語但覺兩頰生微渦我時羽服黃樓上坐見織女初斜

河歸來笛聲滿山谷明月正照金叵羅奈何捨我入塵

土擾擾毛羣欺卧馳不念空齋老病叟退食誰與同委

蛇時來洪上看遺迹忍見屐齒青苔窠詩成不覺雙淚

下悲吟相對惟羊何欲遣佳人寄錦字夜寒手冷無人

呵

傅武仲舞賦目流睇而橫波晉謝鯤傳鯤字幼輿隣家
高氏女有美色鯤挑之女投梭折其兩齒時人為之語
曰任達不已幼輿折齒鯤聞之傲然長嘯曰猶不廢我
嘯歌戰國策蘇秦說齊宣王曰臨淄之途車轂擊人肩
摩異聞集書仙歌長安南坡名臙脂曹家有女名文姬
杜子美遣興詩賦詩何必多往往凌鮑謝宋玉招魂涉
江采菱發陽阿李太白詩涉江弄秋水愛此荷花鮮班
固西都賦毛羣內闕飛羽上覆詩國風委蛇委蛇退食
自公謝靈運登臨海嶠作題云與從弟惠連可見羊何
共和之沈約宋書靈運既東還與族弟惠連東海何長
瑜潁川荀雍太山羊璿之共為山澤之遊時人謂之四
友李白久離別歌中有錦字書開緘使人嗟王仁裕開
寶遺事李白於便殿草詔時大寒筆凍帝令
宮妓十人各執牙筆呵之令白遞取書字

送參寥師

上人學苦空百念已灰冷劍頭惟一映焦穀無新穎胡
為逐吾輩文字爭蔚炳新詩如玉屑出語便清警退之
論草書萬事未嘗屏憂愁不平氣一寓筆所騁頗怪浮
屠人視身如丘井頽然寄淡泊誰與發豪猛細思乃不
然真巧非幻影欲令詩語妙無厭空且靜靜故了羣動
空故納萬境閱世走人間觀身卧雲嶺酸酸雜衆好中
有至味永詩法不相妨此語當更請

維摩經如焦穀牙又是身如丘井為老所逼一映用莊
子字蔚炳用周易字並已見韓退之送高閑上人序張

旭善草書喜怒窘窮酣醉無聊不平有動於心必於草書發之今閑師浮屠氏其為心泊然無所起其於世澹然無所嗜泊與澹相遭顏墮委靡潰敗不可收拾則其於書得無象之乎按公詩乃用其意而反之柳宗元報崔黯書有嗜酸鹹者不得則大戚

夜過舒堯文戲作

名煥字堯文時為教授見本卷中秋月注

先生堂上霜月苦弟子讀書喧兩廡推門入室書縱橫
蠟紙燈籠晃雲母先生骨清少眠臥長夜默坐數更鼓
耐寒石研欲生冰得火銅餅如過雨郎君欲出先自贊
坐客斂衽誰敢侮明朝阮籍過阿戎應作羲之羨懷祖

韓退之桃源歌月明伴宿玉堂空骨冷魂清無夢寐劉
筠詩溪箋未破冰生研白礬天懶放詩今早天氣寒郎
君應不出自贊字出漢書東方朔傳晉王戎傳阮籍嘗
適戎父渾俄頃輒去過戎良久然後出謂渾曰共卿言
不如共阿戎談晉王羲之傳謂諸子曰吾不減懷祖而
位遇懸邈當由汝等不及坦之故邪王述字懷祖坦之
也迷子

十月十五日觀月黃樓席上次韻

中秋天氣未應殊不用紅紗照坐隅山下白雲橫匹素
水中明月臥浮圖未成短棹還三峽已約輕舟泛五湖
為問登臨好風景明年還憶使君無

吳越春秋范蠡扁舟出三
江入五湖人莫知其所適

答王定民

王定民字佐才東
萊人俊民弟也

開緘奕奕滿銀鈎書尾題詩語更道八法舊聞宗長史
五言今復擬蘇州筆蹤好在留臺寺旗隊遙知到石溝
欲寄鼠須并蠶紙請君章草賦黃樓

晉索靖傳草書之為狀也婉若銀鈎飄若驚鸞法書苑
索靖矜其書名曰銀鈎蠶尾又八法起於隸字始自崔
張鍾繇傳授李陽冰云王逸少工書十五年偏工永
字以其八法之勢能通一切字長史張旭也韋蘇州注
再見鼠須蠶紙注見本卷章草漢
元帝時史游作急就章解散隸體

次韻王廷老退居見寄二首

王廷老
字伯敷

浪蘂浮花不辨春歸來方識歲寒人
回頭自笑風波地
閉眼聊觀夢幻身
北牖已安陶令榻
西風還避庾公塵
更搔短髮東南望
試問今誰裹舊巾

韓退之杏花詩浮花浪蘂鎮長有纔開還落瘴霧中金剛經一切有為法如夢幻泡影晉王導傳庾亮雖居外鎮而執朝廷之權導內不能平嘗遇西風起舉扇自蔽徐曰元規塵汙人亮字元規

接果移花看補籬
腰鎌手斧不妨持
上都新事長先到
老圃閒談未易欺
釀酒閉門開社甕
殺牛畱客解耕縻

何時得見纖纖玉右手持杯左捧頤

鮑明遠詩腰鑷刈葵藿杜子美詩獨遶虛齋徑常持小
斧柯唐書劉黑闥屏居漳南諸將詰之黑闥方種蔬即
殺耕牛與之共飲

次韻顏長道送傅倅

兩見黃花掃落英南山山寺遍題名宗成不獨依岑范
魯衛終當似弟兄去歲雲濤浮汴泗與君泥土滿衣纓
如今別酒休辭醉試聽雙洪落後聲

宗岑用東漢宗資成瑁事詳見十一卷趙郎中見和詩
注雙洪蓋徐州二水先生徐州鹿鳴燕賦詩叙云俯聽

雙洪之號
怒即此也

施註蘇詩卷十五

欽定四庫全書薈要卷一萬四千九百六十七

某部

施註蘇詩卷十六

宋 蘇 軾 撰

宋 施元之 註

武進邵長蘅刪補

詩四十八首

起在彭城至元豐已未移守吳興作

雲龍山觀燒得雲字

丁女真水妃寒山便火耘隕霜知已殺坯戶聽初焚束
縕方熠燿敲石俄氤氳落點甘泉烽橫煙楚塞氛窮虵

上喬木潛蛟躡浮雲驚飛墮傷雁狂走迷癡磨谷蟄起
蜩燕山妖竄夔嶺野竹爆哀聲幽桂飄冤芬悲同秋照
蟹快若夏燎蚊火牛入燕壘燧象奔吳軍崩騰井陘口
萬馬皆朱幘搖曳驪山陰諸姨爛紅裙方隨長風卷忽
值絕澗分我本山中人習見匪獨聞偶從二三子來訪
張隱君君家亦何有物象移朝曛把酒看飛燼空庭落
繽紛行觀農事起畦壠如縵紋細雨發春穎嚴霜倒秋
萑始知一炬力洗盡狐兔羣

韓退之陸渾火詩女丁婦壬傳世婚左傳昭九年鄭裨
竈曰火水妃也杜預曰火畏水故為之妃妃一音配史
記貨殖傳楚越之地地廣人稀飯稻羹魚或火耕而水
耨左傳僖三十三年隕霜不殺草定元年冬十月隕霜
殺菽月令蟄蟲坯戶又是月也草木黃落乃伐薪為炭
漢蒯通傳束緼請火毛詩注熠燿燁燁也已見前柳宗元
詩夜發敲石火杜子美烽火詩雲邊落點殘漢匈奴傳
孝文帝時胡騎入代句注邊烽火通於甘泉長安闕輔
記甘泉宮在今池陽縣西去長安三百里左傳襄二十
七年伯夙謂趙孟曰楚氛甚惡漢志天馬歌蕭浮雲蕭
音躡國語木石之怪曰夔魍魎水之怪曰龍罔象土之
怪曰羆羊白樂天別東林詩春雨星攢尋螢火注餘杭
風俗寒食雨後家家持燭尋螢歐陽公憎蚊詩燻簷苦
煙埃燎壁疲照燭史記田單傳灌脂束葦於牛尾燒其
端夜縱之牛尾熱怒而奔燕軍所觸盡死左傳定四年
楚鍼尹固與昭王同舟王使執燧象以奔吳師杜預曰

燒火燧繫象尾使赴吳師驚卻之謝靈運詩崩騰永嘉
末韓退之詩崩騰相排撥漢韓信傳未至井陘口三十
里止舍夜半傳發選騎二十人人持一赤幟從間道草
山而望趙軍戒曰趙見我走必空壁逐我若疾入拔趙
幟立漢幟趙軍還歸壁壁昏漢赤幟大驚遂亂遁走毛
詩碩人註朱愔以朱纒鑣扇汗也舊唐書楊貴妃傳姊
三人皆有才貌玄宗並封夫人長曰大姨封韓國三姨
封虢國八姨封秦國每年十月幸華清宮國忠姊妹五
家扈從每家一隊著五色衣五家合隊照映如百花之
煥發互見八卷和蘇州太守詩註玄宗紀天寶六載改
驪山溫泉
為華清宮

和田國博喜雪

疇昔月如晝曉來雲暗天
玉花飛半夜翠浪舞明年
螟

騰無遺種流亡稍占田歲豐君不樂鐘磬幾時編

公自注田

有服
不樂

禮記檀弓余疇昔之夜王注玉花言雪翠浪言麥雪感
別麥熟也柳子厚詩麥芒際天搖青波詩小雅去其螟
蝻及其蠹賊漢宣帝紀流民自占八萬
餘口周禮磬師註宮懸有編鐘編磬

祈雪霧豬泉出城馬上作贈舒堯文

三年走吳越踏遍千重山朝隨白雲去暮與棲鴉還
翩如得木狖飛步誰能攀一為符竹累坐老敲榜間此行
亦何事聊散腰腳頑浩蕩城西南亂山如玦環山下野

人家桑柘雜榛菅，歲晏風日暖人牛相對閒。
薄雪不蓋土麥苗，稀可剛願君發豪句嘲詆破天慳。

韓退之詩青玉刻佩聯玦環果州清居和尚述牧牛圖
第十章露地白牛安眠牧者禪寂第十一章牛亡而鞭
箠尚在第十二
章人牛俱亡

次韻舒堯文祈雪霧豬泉

長笑蛇醫一寸腹，銜水吐電何時足。
蒼鵝無罪亦可憐，斬頸橫盤不敢哭。
豈知泉下有豬龍，卧枕雷車踏陰軸。
前年太守為旱請，雨點隨人如撒菽。

公自注傳欽之
曾禱此泉得雨

守歸國龍歸泉至今人詠淇園綠我今又復罹此旱凜

凜疲民在溝瀆卻尋舊跡叩神泉坐客仍攜王子淵公自

注欽之時容
惟舒在矣

看草中和樂職頌新聲妙語慰華顛曉來

泉上東風急須上冰珠老蛟泣怪詞欲逼龍飛起嶮韻

不量吾所及行看積雪厚埋牛誰與春工掀百蟄此時

還復借君詩餘力汰翰仍貫笠揮毫落紙勿言疲驚龍

再起震失匙

酉陽雜俎王彥威鎮汴夏旱季玘曰欲雨甚易耳求蛇
醫四頭十石甕二枚每甕二蛇醫水浮其中木蓋泥之

分置開處設席燒香選小兒十歲已下十餘令執小青
竹晝夜擊之不得少輟一日兩夜雨大注蛇醫蜥蜴別
名夷堅乙志劉居中隱嵩山巔有大蜥蜴數百皆長三
四尺人以食就手飼之拊摩其體滑膩如脂一日聚繞
水盞邊各就取水纔入口即吐出已圓結似彈丸積之
於側俄頃間纍纍滿地忽震雷一聲彈丸皆失去明日
人來言昨午雨雹大作乃知蜥蜴所為者此也王注祈
雨法刑白鵝景德皇祐中詔以其法攷下諸道又志林
云鵝能驚盜亦能卻蛇且又有祈雨厄悲夫北夢瑣言
邛州有湫有北豕出入號豬龍湫又元和末建州山寺
夜半門外喧然人於牕中窺見數人運斤造雷車博物
志地下四柱三十六萬軸犬牙相牽漢王褒字子淵作
中和樂職宣布詩詳見十卷次韻張傳道喜雨詩注後
漢崔駰傳包胥單辭而存楚唐且華顛以悟秦注華顛
謂白首也左傳宣四年伯棼射王汰軒以貫
笠轂三國蜀先主傳方食失匕箸注已見

石炭 并引

彭城舊無石炭元豐元年十二月始遣人訪獲於
州之西南白土鎮之北冶鐵作兵犀利勝常云

君不見前年雨雪行人斷城中居民風裂骨濕薪半束
抱衾裯日暮敲門無處換豈料山中有遺寶磊落如礫
衣音萬車炭流膏迸液無人知陣陣腥風自吹散根苗一
發浩無際萬人鼓舞千人看投泥潑水愈光明燦玉流
金見精悍南山栗林漸可息北山頑鑛何勞鍛為君鑄

作百鍊刀要斬長鯨為萬段

杜子美詩城中斗米換衾裯相許寧論兩相直唐韻磬
美石黑色楚辭宋玉招魂十日代出流金燦石晉載記
赫連勃勃造百鍊剛刀為龍雀大環李白王節士歌安
得倚天劍跨海斬長鯨唐段秀實傳罵未訛云狂賊可
設斬萬

人日獵城南會者十人以身輕一鳥過槍急萬

人呼為韻得鳥字

京東第二將雷勝隴西人以
勇敢應募得官武力絕人騎

射敏妙按閱於徐徐人欲觀其能公為小獵
城西是日小雨甫晴土潤風和觀者數千人

公作獵
會詩序

兒童笑使君憂愠長悄悄誰拈白接羅令跨金駉裏東

風吹濕雪手冷怯清曉忽發兩鳴鶻

虛交切

相趁飛螭小

放弓一長嘯目送孤鴻矯吟詩忘鞭轡不語頭自掉歸
來仍脫粟鹽豉煮芹蓼何似雷將軍兩眼霜鶻皎黑頭
已為將百戰意未了馬上倒銀瓶得兔不暇燎少年負
竒志蹭蹬百憂繞回首英雄人老死已不少青春還一
夢餘年真過鳥莫上呼鷹臺平生笑劉表

詩國風憂心悄悄愠于羣小唐韻接羅白帽也晉山簡
事注再見杜子美詩細馬時鳴金駉裏唐韻鶻箭即鳴

鎬也漢匈奴傳冒頓迺作鳴鎬習勒其騎射因話錄揚
巨源年老頭數掉言吟詩多致得白樂天詩閑倚小橋
立掉頭時一吟唐書令狐潮圍雍丘雷萬春立城上面
中六矢而不動潮遂謂張巡曰向見雷將軍乃知足下
軍令矣晉諸葛恢傳王導嘗謂曰明府當為黑頭公杜
子美詩馬上誰家白面郎又指點銀瓶索酒嘗世說魏
武將見匈奴使自以形陋不足雄遠國使崔季珪代帝
自捉刀立牀頭既畢使間諜問曰魏王何如匈奴使答
曰魏王雅望非常然牀頭捉刀人此乃英雄也張景陽
雜詩人生瀛海內忽如鳥過目杜子美詩餘生如過鳥
襄陽耆舊傳劉表為荊州刺史築臺名呼鷹仍作野鷹
來由襄沔記劉表呼鷹臺在縣東七里高三丈同七十
丈

將官雷勝得過字代作

胡騎入雲中

一作
回中

急烽連夜過短刀穿鹵陣濺血貂裘

澆一來輦轂下愁悶惟欲臥今朝從公獵稍覺天宇大

一雙鐵絲箭未發手先唾射殺雪毛狐腰間餘一箇

漢匈奴傳孝文後四年匈奴大入上郡雲中各三萬騎

漢書注回中地在安定其中更有宮劉禹錫登天壇詩俯

觀羣動靜始覺天宇大杜子美期王將軍不至詩憶爾
腰下鐵絲箭射殺林中雪色鹿後漢公孫瓚傳始天下

兵起我謂
唾掌可決

臺頭寺步月得人字

風吹河漢掃微雲步屨中庭月趁人
浥浥爐香初泛夜

離離花影欲搖春
遙知金闕同清景
想見羶車碾暗塵
回首舊遊真是夢
一簪華髮岸綸巾

臺頭寺送宋希元

相從傾蓋只今年
送別南臺便黯然
入夜更歌金縷曲

他時莫忘角弓篇

公自注是日與宋君同栽松寺中

三年不顧東鄰女

公自注取宋玉

二頃方求負郭田

公自注取季子

我欲歸休君未可
茂

先方議斲龍泉

江文通別賦黯然消菟者唯別而已杜牧之秋娘詩秋
持玉笋醉與唱金縷衣左傳昭二年晉侯使韓宣子來

聘享之韓子賦角弓既享宴於季氏有嘉樹焉韓宣子
譽之武子曰宿敢不封殖此樹以無忘角弓宋玉好色
賦臣東家之子登牆闚臣三年至今未許也晉張華傳
字茂先初牛斗間常有紫氣華聞豫章人雷煥妙達緯
象乃要問之煥曰寶劍之精上徹於天耳問何郡煥曰
在豫章豐城即補煥為豐城令煥到縣掘獄基入地四
丈得石函中有雙劍並刻題一曰龍泉二曰太阿是夕
斗牛間氣不復見杜子美詩徒勞望牛斗無計斲龍泉

種松得徠字

公自注其四在懷古
堂其六在石經院

春風吹榆林亂英飛作堆荒園一雨過戢戢千萬栽青
松種不生百株望一枚一枚已有餘氣壓千畝槐野人
易斗粟云自魯徂徠魯人不知貴萬竈飛青煤束縛同

一車胡為乎來哉
泣然解其縛
清泉洗浮埃
枝傷葉尚
困生意未肯回
山僧老無子
養護如嬰孩
坐待走龍蛇
清陰滿南臺
孤根裂山石
直幹排風雷
我今百日客

自公

注時去替
不百日

養此千歲材
茯苓無消息
雙鬢日夜摧
古今

一俛仰作詩寄餘哀

詩魯頌徂徠之松
新甫之柏
杜子美詩
幹排雷雨
猶力
爭淮南子
千歲之松
下有茯苓
上有兔絲
抱樸子
松脂
入地千年
變為茯苓
又任子
季服
茯苓十八年
不復食
穀面體
玉光

作書寄王晉卿
忽憶前年寒食
北城之游走筆

為此詩

王晉卿名詵太原人徙開封能詩善畫以選尚魏國賢惠公主母宣仁高后於

神宗為同產晉卿慕東坡相

典游從嘗為作寶繪堂記

北城寒食烟火微落花胡蝶作團飛
王孫出游樂忘歸
門前驄馬紫金鞵吹笙帳底煙霏霏
行人舉頭誰敢睇
扣門狂客君不麾更遣傾城出翠帷
書生老眼省見稀
畫圖但覺周昉肥別來春物已再菲
西望不見紅日圍
何時東山歌采薇把盞一聽金縷衣

李賀秦宮詞帳底吹笙香霧濃再見唐韻睇望也盼也
柳子厚聞歌詩翠帷雙卷出傾城歷代畫斷周昉畫子

女為古今之冠王注東山東征之
詩也采薇三章皆言曰歸曰歸

往在東武與人往反作粲字韻詩四首今黃魯
直亦次韻見寄復和答

符堅破荊州止獲一人半中郎老不遇但喜識元歎我
今獨何幸文字厭竒玩又得天下才相從百憂散陰求
我輩人規作林泉伴寧當待垂老倉卒收一旦不見梁
伯鸞空對孟光案才難不其然婦女厠周亂世豈無作
者於我如既盥一作灌獨喜誦君詩咸韶音節緩夜光一

已多矧獲纍纍貫相思君欲瘦不往我真懦吾儕眷微
祿寒夜抱寸炭何時定相過徑就我乎館飄然東南去
江水清且暖相與訪名山微言師忍粲

晉習鑿齒傳襄陽陷於苻堅堅素聞其名與釋道安俱
輿而至以其有寔疾與諸鎮書云昔晉氏平吳利在二
陸今破漢南獲士才一人半耳又高僧傳云苻堅謂安
公一人鑿齒半人也晉地理志魏盡得荊州之地分南
郡以北立襄陽郡江表傳蔡伯喈貴異顧雍謂曰卿必
成名今以吾名與卿故名雍吳錄顧雍為蔡邕所歎故
字元歎蔡邕初平元年拜左中郎將晉石苞傳許允謂
苞曰卿是我輩人杜子美嚴別駕相從歌垂老遇君未
恨晚似君當向古人求韓退之別知賦惟知心而難得
斯一旦而為叙述異記有珠夜可以鑿故名夜光趙后

外傳真臘夷獻萬年蛤不夜珠光彩皆若月照獻帝春秋呂布問曹公明公何瘦荅曰所以瘦恨不蚤相得故也杜子美寄岑參詩思君令人瘦家語孔子曰生於我乎館杜子美聽許十誦詩余亦師策可身猶縛禪寂傳燈錄第三十祖僧策三十二祖弘忍即中華三祖五祖也

雪齋

公自注杭僧法言作雪山於齋中

君不見我着山西雪千里北望成都如井底春風百日吹不消五月行人如凍蟻紛紛市人爭奪中誰信言公似贊公人間熱惱無處洗故向西齋作雪峰我夢扁舟入吳越長廊靜院燈如月開門不見人與牛

公自注言有詩見寄

云林下閑
看水牯牛
惟見空庭滿山雪

楚辭招魂曾冰峩峩飛雪千里舊唐書杜棕傳吐蕃維
州南界江陽岷山連嶺而西不知其極北望隴山積雪
如玉東望成都若在井底鹵號無憂城李德裕傳亦云
新書吐蕃傳削去成都井底語杜子美詩贊公禪門老
放逐還上國華嚴經以白旃檀塗身能除一切熱惱
白樂天詩既無白旃檀何以除熱惱人牛注見本卷

以雙刀遺子由子由有詩次其韻

寶刀匣不見但見龍雀環何曾斬蛟蛇亦未切琅玕胡
為穿窬輩見之要領寒吾刀不汝問有媿在其肝念此
力自藏包之虎皮斑湛然如古井終歲不復瀾不憂無

所用憂在用者難佩之非其人匣中自長嘆我老衆所
易屢遭非意干惟有王玄通堦庭秀芝蘭知子後必大
故擇刀所便屠狗非不用一歲六七利欲試百鍊剛要
須更泥蟠作詩銘其背以待知者看

龍雀鏤用赫連勃勃事注見本卷王粲刀銘陸剗犀兕
水截鯨鯢列子湯問篇周穆王征西戎西戎獻昆吾之
劍用之切玉如切泥焉漢張騫傳竟不得月氏要領杜
子美詩妖腰亂領敢欣喜禮記倒載干戈包之以虎皮
白樂天古劍詩湛然玉匣中秋水澄不流又詩無波古
井水韓退之詩法曹貧賤衆所易晉衛玠云非意相干
可以理遣再見晉王覽傳覽字玄通呂虔有佩刀工相
之以為必登三公可佩此刀虔謂覽兄祥曰卿有公輔

之量故以相與祥臨薨以刀授覽曰汝後必興足稱此
刀覽後奕世多才興於江左左傳閔元年卜偃曰畢萬
之後必大史記刺客傳荆軻愛燕之狗屠及善擊筑者
高漸離又樊噲傳沛人也以屠狗為事漢書注利圭角
泥鑠也莊子養生主族庖月更刀折也揚子龍蟠於
泥坳其肆矣家語周廟金人三緘其口而銘其背

游桓山會者十人以春水滿四澤夏雲多奇峰

為韻得澤字

東郊欲尋春未見鶯花迹春風在流水鳧鴈先拍拍孤
帆信溶漾弄此半篙碧艤舟桓山下長嘯理輕策彈琴
石室中幽響清磔磔弔彼泉下人野火失枯腊悟此人

間世何者為真宅暮回百步洪散坐洪上石愧我非王
 襄子淵肯見客臨流吹洞簫水月照連壁此歡真不朽
 回首歲月隔想像斜川游作詩繼彭澤

韓退之病鳩詩青泥揜兩翅拍拍不得離桓山在彭城
 泗水上即宋司馬桓黜墓又先生游桓山記云登桓山

入石室使道士戴日祥鼓雷氏之琴此詩蓋紀實也莊
 子有人間世篇漢楊玉孫傳報祈侯書曰支體束絡口

舍玉石欲化不得鬱為枯腊千載之後棺槨朽腐乃得
 歸土就其真宅漢王褒有洞簫賦子淵褒字又王褒為

益州刺史得王褒薦之詳已見前連壁謂王氏兄弟子
 立子敏也晉夏侯湛傳與潘安仁同與接茵京都人謂

之連壁陶淵明游斜川詩引云辛丑歲正月五日與二
 三鄰曲同游斜川欣對不足共爾賦詩淵明嘗為彭澤

令

戴道士得四字代作

戴日祥江
南人也

少小家江南寄跡方外士偶隨白雲出賣藥彭城市雪
霜侵鬢髮塵土汙冠袂賴此三尺桐中有山水意自從
夷夏亂七絲一作絃久已弃一作廢心知鹿鳴三不及胡琴
四使君獨慕古嗜好與衆異共弔桓魋宮一灑孟嘗淚
歸來鎖塵匣獨對斷絃喟挂名石壁間寂寞千歲事

韓退之送張道士詩序寄跡老子法中莊子大宗師孔
子曰彼游方之外者也後漢韓康傳常采藥名山賣於

長安市琴操琴長三尺六寸六分以象三百六十六日
列子湯問篇伯牙善鼓琴鍾子期善聽伯牙鼓琴志在
高山子期曰善哉我子若太山志在流水子期曰善
哉洋洋乎若江河古今樂錄天寶十三載始詔道調法
曲與胡部新聲合作自爾夷夏之聲相亂無復辨者左
傳襄四年歌鹿鳴之三三拜琴操有鹿鳴曲三疊胡琴
琵琶也本胡中馬上所鼓四絃以象四時詳五卷宋叔
達家聽琵琶詩注孟嘗涑用雍門周鼓琴事詳見四卷
甘露寺詩注呂氏春秋鍾子期死伯牙破琴絕絃終
身不復鼓琴杜子美詩千秋萬歲名寂寞身後事

次韻田國博部夫南京見寄二絕

歲月翩翩下坂輪歸來杏子已生人深紅落盡東風惡
柳絮榆錢不當春

火冷錫稀杏粥稠青裾縞袂餉田頭大夫行役家人怨
應羨居鄉馬少游

玉燭寶典寒食為大麥粥研杏仁為酪引錫沃之李義
山詩粥香錫白杏花天白樂天詩留錫和冷食出火煮
新茶馬少游語在後漢馬
援傳詳見六卷山村詩註

月夜與客飲杏花下

真蹟草書在武寧宰吳節
夫家今刻於黃州先生詩

話僕在徐州王子立子敏皆館於予蜀人張
師厚來過二王方年少吹洞簫飲酒杏花下

杏花飛簾散

石刻
作報

餘春明月入戶尋幽人褰衣步月踏

花影炯如流水涵青蘋花間置酒清香發爭挽長條落

香雪山城薄酒不堪飲
勸君且吸杯中月
洞簫聲斷月明中
惟憂月落酒杯空
明朝卷地春風惡
但見綠葉栖殘紅

送蜀人張師厚赴殿試二首

忘歸不覺鬢毛斑
好事鄉人尚往還
斷嶺不遮西望眼
送君直過楚王山

韓退之西山詩為遮西望眼終是懶回頭史記項羽紀自立為西楚霸王王九郡都彭城王注此地有楚王山

雲龍山下試春衣
放鶴亭前送落暉
一色杏花三十里

新郎君去馬如飛

公放鶴亭記雲龍山人張天驥於故居之東作亭山人有二鶴旦則望西山之缺以放焉暮則縻東山而歸故名之曰放鶴亭撫言神龍以來新進士杏園宴後皆於慈恩塔下題名又薛監逢值新進士出前導曰迴避新郎君又沈嵩得新榜封示羅隱隱詩曰人如流電馬如飛

再次韻答田國博部夫還二首

西郊黃土沒車輪滿面風埃笑路人已放役夫三萬指
從教積雨洗殘春

枝上稀疎地上稠忍看紅糝落牆頭風流別乘多才思

歸趁西園秉燭游

白樂天詩枝上稀疎地上多韓退之詩始見洛陽春桃
枝綴紅糝唐置別駕為太守之貳謂之別乘魏文帝詩
乘輦夜行遊道遠步西園古詩何不秉燭遊

田國博見示石炭詩有鑄劍斬佞臣之句次韻
答之

楚山鐵炭皆竒物知君欲斫姦邪窟屬鏤無眼不識人
楚國何曾斬無極玉川狂直古遺民救月裁詩語最真
千里妖墓一寸鐵地上空愁蟻蝨臣

左傳哀十一年吳王賜子胥屬鏤以死又昭二十七年
楚令尹子常殺費無極王注無眼不識人暗用國志云
此箭無眼不識人語周禮夏官大僕救日月亦如之秋
官庭氏救月之矢夜射之盧仝月蝕詩傳聞古老說月蝕
蝮慕精徑圍十尺入汝腹如此癡騃阿誰生又地上蟻
蝨臣仝告訴帝天皇臣心有鐵一寸可剗妖墓痴腸仝
號玉
川子

答郡中同僚賀雨

水旱行十年饑疫遍九土奇窮所向惡歲歲祈晴雨雖
非為已求重請終愧古鬼神亦知我老病入腰脊何曾
拜向人此意難不許重雲萋已合微潤先流礎蕭蕭止

還作坐聽及三鼓天明將吏集泥土滿鞞屨登城望麩
麥綠浪風掀舞愧我賢友生雄篇闢新語君看大熟歲
風雨占十五天地本無功祈禳何足數渡河不入境豈
若無蝗虎而况刑白鵝下策君勿取

穀梁子雩者為旱求者也求者請也古人重請何重乎
請人之所以為人者讓也請道去讓也唐書田承嗣盜
有貝博魏衛相磁洛七州未嘗入朝每對詔使言辭不
遜郭子儀遣使至承嗣西望拜曰茲膝不屈於人久矣
今為公拜詩小雅有滄萋萋注滄雲興貌淮南子山雲
蒸而柱礎潤京房易候太平之世五日一風十日一雨
後漢劉昆傳為弘農太守虎皆負子渡河卓茂傳為密
令時天下大蝗河南二十餘縣皆被其災獨不入密縣

界刑鵝用以祈雨事具景德皇祐詔書又見本卷後漢
匈奴傳漢得下策世說周仲智飲酒醉瞋目還面舉蠟
燭火擲伯仁伯仁笑曰
阿奴火攻固出下策耳

罷徐州往南京馬上走筆寄子由五首

吏民莫扳援歌管莫淒咽吾生如寄耳寧獨為此別別
離隨處有悲惱緣愛結而我本無恩此涕誰為設紛紛
等兒戲鞭鞅遭割截道邊雙石人幾見太守發有知當
解笑撫掌冠纓絕

法華經大通智勝如來廣說十二因緣觸緣受受緣愛
又生緣老死憂悲苦惱漢周亞夫傳霸上棘門持兒戲

耳聞元天寶遺事姚崇收荊州受代日吏民泣擁馬首
截鐵留鞭以為遺愛漢百官表郡守秦官景帝中二年
更名太守晉陸雲傳張華撫掌大笑史
記滑稽傳淳于髡仰天大笑冠纓索絕

父老何自來花枝裊長紅洗盞拜馬前請壽使君公前
年無使君魚鼈化兒童舉鞭謝父老正坐使君窮窮人
命分惡所向招災凶水來非吾過去亦非吾功

後漢劉寵傳自會稽太守徵為將作大匠山陰縣有五
六老叟廼着皓髮人齎百錢以送寵寵勞之曰父老何
自苦王注方俗送官罷任以花枝挂綵謂之長紅白樂
天初到江州詩將迎勞動使君公左傳昭元年劉子曰
微禹吾其魚乎

古汴從西來迎我向南京東流入淮泗送我東南行暫

別復還見依然有餘情春雨

一作風

漲微波一夜到彭城

過我黃樓下朱欄照飛甍可憐洪上石誰聽月中聲

前年過南京麥老櫻桃熟今來舊游處櫻麥半黃綠歲
月如宿昔人事幾反覆青衫老從事坐穩生髀肉聯翩
閱三守迎送如轉轂歸耕何時決田舍我已卜

杜子美魏將軍歌將軍昔著從事衫九州春秋劉備在
荊州嘗於劉表坐起至廁見髀裏肉生流涕曰平常身
不離鞍髀肉皆消今不復騎髀裏肉生日月若馳老將
至矣而功業不建是以悲耳賈島詩碌碌復碌碌百年

轉雙
轂

卜田向何許石佛山南路下有爾家川千畦種杭徐山
泉宅龍蟄平地走膏乳異時畝一金近欲為逃戶逝將
解簪紱賣劍買牛具故山豈不懷廢宅生蒿穰便恐桐
鄉人長祠仲卿墓

王注石佛山在着州着山縣之南溪東方朔傳鄧錡之
間號為土膏其買畝一金李太白詩幾日相別離門前
生穰葵漢朱邑傳字仲卿少時為桐鄉嗇夫遇民有恩
吏民敬愛焉及死其子葬之桐鄉西郭外民共為邑起
冢立祠歲時祠祭又互見
二卷送任叔通判詩注

次韻曹九章見贈

蘧瑗知非我所師，流年已似手中著。正平獨肯從文舉，中散何曾靳孝尼。賣劍買牛真欲老，得錢沽酒更無疑。雞豚異日為同社，應有千篇唱和詩。

蘧瑗事出淮南子注，已見周易大衍之數五十，其用四十，有九後漢禰衡傳，字正平，唯善孔融，及楊脩，常曰：大兒孔文舉，小兒楊德祖，融亦深愛其才，上疏薦之，融字文舉，晉嵇康傳，將刑，東市索琴彈之，曰：昔袁孝尼嘗從吾學，廣陵散每靳固之，廣陵散於今絕矣，康仕魏，為中散大夫，袁准字孝尼，杜子美醉時歌，得錢即相覓，沽酒不復疑，韓退之南谿詩，願為同社人，雞豚燕春秋。

書泗州孫景山西軒

落日明孤塔青山繞病身知君向西望不愧塔中人

泗州有僧伽塔塔中人蓋指僧伽

過淮三首贈景山兼寄子由

好在長淮水十年三往來功名真已矣歸計亦悠哉
今日風憐客平時浪作堆晚來洪澤口捍索響如雷

離騷已矣國無人莫我知兮漢蘇武傳李陵曰已矣令
子卿知吾心耳詩國風悠哉悠哉九域志楚州淮陰縣

洪澤鎮

過淮山漸好松檜亦蒼然
藹藹藏孤寺泠泠出細泉
故人真吏隱小檻帶巖偏
卻望臨淮市東風語笑傳

杜子美高齋詩吏隱適性情汝南先賢傳鄭欽吏隱于蟻陂之陽

回首淮陽幕簿書高没人
何時桐柏水一洗庾公塵
此去漸佳境獨游長慘神
待君詩百首來寫浙西春

桐柏山在唐州桐栢縣淮水所出庾公塵用王尊語庾亮字元規注見上卷次韻王廷老退居晉顧愷之傳每食甘蔗常自尾至本人或怪之云漸入佳境

舟中夜起

微風蕭蕭吹菰蒲開門看雨月滿湖舟人水鳥兩同夢
大魚驚竄如奔狐夜深人物不相管我獨形影相嬉娛
暗潮生渚弔寒蚓落月挂柳看懸珠此生忽忽憂患裏
清境過眼能須臾雞鳴鐘動百鳥散船頭擊鼓還相呼
余去金山五年而復至次舊詩韻贈寶覺長老
誰能斗酒博西涼但愛齋厨法豉香舊事真成一夢過
高譚為洗五年忙清風偶與山阿曲明月聊隨屋角方
稽首願師憐久客直將歸路指茫茫

斗酒西涼用後漢孟陀事注再見法鼓出金山他處莫
能及僧每以小巽醜遺遠客詩大雅有卷者阿飄風自
南鄭氏云大陵曰阿有大陵卷然而曲迴風從長養之
方來入之劉禹錫生公講堂詩一方明月可中庭韓退
之喜侯喜至詩欵眠
聽新詩屋角月艷艷

遊惠山

并引

余昔為錢塘倅往來無錫未嘗不至惠山既去五
年復為湖州與高郵秦太虛杭僧參寥同至覽唐
處士王武陵竇羣朱宿所賦詩愛其語清簡蕭然
有出塵之姿追用其韻各賦三首

夢裏五年過覺來雙鬢蒼還將塵土足一步漪瀾堂俯
窺松桂影仰見鴻鶴翔炯然肝肺間已作冰玉光虛明
中有色清淨自生香還從世俗去永與世俗忘

漪瀾堂寺

中堂名

薄雲不遮山疎雨不濕人蕭蕭松徑滑策策芒屨新嘉
我二三子皎然無緇磷勝游豈殊昔清句仍絕塵弔古

泣舊史疾讒歌小旻哀哉扶風子難與巢許鄰

公自注謂竇羣

毛詩小旻大夫刺幽王也唐竇羣傳兄弟皆擢進士第
獨羣以處士客隱毘陵蘇州刺史韋夏卿薦之朝并表

其書報聞不召後夏鄉入為京兆尹復言之德宗擢為
左拾遺後為御史中丞上言李吉甫陰事憲宗面覆得
其情大怒將誅羣吉甫為之
解乃免子姓編實望出扶風

敲火發山泉烹茶避林樾明牕傾紫盞色味兩竒絕吾
生眠食耳一飽萬想滅顏笑玉川子饑弄三百月豈如
山中人睡起山花發一甌誰與共門外無來轍

盧仝詩手閤月團
三百片注再見

贈惠山僧惠表

行遍天涯意未闌將心到處遣人安山中老宿依然在

案上楞嚴已不看，欹枕落花餘幾片。
閉門新竹自千竿。
客來茶罷空無有，盧橘楊梅尚帶酸。

安心二祖公案注屢見司馬相如上

林賦：盧橘夏熟，黃柑橙檮杞，杞燃柿。

贈錢道人

書生苦信書，世事仍臆度。
不量力所負，輕出千鈞諾。
當時一快意，事過有餘怍。
不知幾州鐵，鑄此一大錯。
我生涉憂患，常恐長罪惡。
靜觀殊可喜，腳淺猶容卻。
而况錢夫子，萬事初不作。
相逢更何言，無病亦無藥。

漢季布傳楚人曰得黃金百不如得季布諾杜子美詩
人生快意多所辱北夢瑣言唐羅紹威帥魏博疾牙軍
之驕以計殺之至八千家雖去其偏而漸為梁祖凌制
乃謂親吏曰聚六州四十三縣鐵鑄一箇錯不成傳燈
錄道吾和尚一鉢歌無可離無可著何處更求無病藥
藥是病病是藥到頭兩事須拈卻亦無藥亦無病正是
真如靈覺性

與秦太虛參寥會于松江而關彥長徐安中適
至分韻得風字二首

吳越溪山興未窮又扶衰病過垂虹浮天自古東南水
送客今朝西北風絕境自忘千里遠勝游難復五人同

舟師不會留連意擬看斜陽萬頃紅

垂虹吳江長橋名郭氏玄中記天下之多者水馬
浮天載地白樂天詩波紅日斜沒沙白月平鋪

二子緣詩老更窮人間無處吐長虹平生睡足連江雨
盡日舟橫擘岸風人笑年來三黜慣天教我輩一樽同
知君欲寫長相憶更送銀盤尾鬣紅

南史江淹謂郭鞏曰子咳唾成珠玉吐氣作虹霓非碌
碌儔比也盧仝月蝕詩今夜吐艷如長虹杜牧之詩一
夜風吹竹連江雨送秋王注南中風吹舟拍岸謂之
卷岸風吹舟離岸謂之開岸風擘岸乃開岸之義也

次韻關令送魚

舉網驚呼得巨魚，饒涎不易忍流酥。
更煩赤腳長鬚老，來聽西風十幅蒲。

韓退之寄盧仝詩：先生有意許降臨，更遣長須致雙鯉。
杜荀鶴詩：連天一水浸吳東，十幅帆飛二月風。
國史補：舟船之盛，盡於西江。編蒲為帆，大者或數十幅。
自白沙泝流而上，常待東北風，謂之潮信風。

次韻秦太虛見戲耳聾

君不見詩人借車無可載，留得一錢何足賴。
晚年更似杜陵翁，右臂雖存耳先聵。
人將蟻動作牛鬪，我覺風雷真一噫。
間塵掃盡根性空，不須更枕清流派。
大朴初散

失渾沌六鑿相攘更勝敗眼花亂墜酒生風口業不停

詩有債君知五蘊皆是賊人生一病今先差瘥全楚
懈切但

恐此心終末了不見不聞還是礙今君疑我作佯聾故

作嘲詩窮驗怪須防額癢出三耳莫放筆端風雨快

孟郊移居詩借車載家具家具少於車杜子美空囊詩
囊空恐羞澁留得一錢看又清明詩此身漂泊苦西東
右臂偏枯左耳聾晉殷仲堪傳父忠嘗患耳聰聞牀下
蟻動云牛鬪圓覺經識清淨故聞塵清淨聞清淨故耳
根清淨枕流用孫楚語屢見莊子應帝王儻與忽謀報
渾沌之德曰人皆有七竅此獨無有嘗試鑿之日鑿一
竅七日而渾沌死內典五蘊色受想行識也傳燈錄壽
州道樹禪師云伊伎倆有窮吾不見不聞無盡楚辭九

章蓀佯聾而不聞張君房勝說隋董慎為冥府追為右
曹仍辟常州秀才張審通管記慎令為判申天府有黃
衫人持狀去少頃復至云所申不當慎怒呼左右取方
寸肉塞其一耳遂無所聞審通乞更為判後有天符來
云甚允當慎喜謂審通曰非君不可正此獄命左右割
去耳肉擘為耳安於額上曰塞君一耳與君三耳審通
復活後數日覺額癢湧出一耳尤聰時人笑曰天有九
頭鳥地有三耳秀才亦呼為雞冠秀才杜子美寄李白
詩筆落

驚風雨

端午遍遊諸寺得禪字

肩輿任所適遇勝輒留連焚香引幽步酌茗開淨筵微
雨止還作小牕幽更妍益山不見日草木自蒼然

公詩話自

云非至吳越
不見此景也
忽登最高塔
眼界窮大千
卞峰照城郭
震

澤浮雲天深沈
既可喜曠蕩亦所便
幽尋未云畢墟落
生晚烟歸來記所歷
耿耿清不眠道人亦未寢
孤燈同

夜禪

晉王獻之傳嘗經吳郡聞顧辟疆有名園先不相識乘
肩輿徑入湖州圖經卞山極峻清秋爽月不見其頂尚
書震澤底定孔安國云吳縣南太湖名也吳郡續圖經
太湖在吳縣南禹貢謂之震澤周官爾雅謂之具區史
記國語謂之五湖其實一也吐吸江海包絡
丹陽義興吳郡吳興之境詩國風耿耿不寐

送劉寺丞赴餘姚

中和堂後石楠樹與君對牀聽夜雨玉笙哀怨不逢人
但見香煙橫碧縷謳吟思歸出無計坐想蟋蟀空房語
明朝開鑠放觀潮豪氣正與潮爭怒銀山動地君不看
獨愛清香生雲一作霧別來聚散如宿昔城郭空存鶴
飛去我老人間萬事休君亦洗心從佛祖手香新寫法
界觀眼淨不覩登伽女餘姚古縣亦何有龍井白泉甘
勝乳千金買斷顧渚春似與越人降日注

白樂天招張司業詩能來同宿否聽雨對牀眠王注風
雨對牀事見與子由別於鄭州詩注中和堂在杭州先

生為倖日監秋試意劉寺丞為試官也風俗通漢章帝時零陵文學奚景於舜祠下得笙蓋白玉管也乃知古以玉為笙後又易以竹耳白樂天待漏入閤詩碧縷爐香直紅垂旒尾閑王注先生監試杭州時以八月十六日放榜故云明朝開鎖放觀潮前有監試呈諸試官又催試官考較戲作可攷也柳子厚答夢得詩耦耕若便遺身世黃髮相看萬事休周易聖人以此洗心莊子山木篇願君剗形去皮洗心去欲而游於無人之地法界觀明華嚴品中法界大旨注已見楞嚴經摩登伽女以婆叱迦羅先梵天呪攝阿難入於婬室唐地理志越州餘姚縣武德四年析故句章縣置龍井餘姚有龍泉寺在縣西王荆公嘗題詩云山腰石有千年潤井眼泉無一日乾杜子美太平寺泉眼詩香美勝牛乳顧渚在湖州長興縣產茶劉禹錫試茶詩何況蒙山顧渚春白泥赤印走風塵日注在越州



施註蘓詩卷十六



總校官庶吉士 臣張能照

校對官編修 臣楊壽楠

謄錄監生 臣張復

謄錄監生 臣吳鏞